

Wednesday, December 10, 2025

Time - 2:30pm - 2:35pm

**AKASHVANI AIZAWL
REGIONAL NEWS UNIT**

RS MP

Parliament Winter Session neih mekah Rajya Sabha MP Pu K. Vanlalvena'n Income Tax Certificate phutna Mizoten an dawng thin chu India dan kalh anih thu a sawi.

Pu K. Vanlalvena chuan India Constitution hnuai Income Tax Act section 10(26) in a tarlan angin India ram chhunga Tribal hnam te chu Income Tax awl an nih thu leh hemi a nih avang hian Mizo mipuite chu India Constitution in chhiah a awl thu a sawi a, Hetiang a nih mek lai hian Mizo mipuite zingah Income Tax Certificate phutna thuchhuah Income Tax Office, Guwahati, Assam atanga hriattirna dawng an awm thin thu a sawi chhuak a. Mizo te chu Income Tax pe ngai lo an nih avang leh tribal an nih avangin Income Tax awl an nihna certificate, Tribal Certificate te chu Income Tax Official-re hnena entir hnuah Income tax official te chuan an la tihbuai zui fo thute sawi chhuakin, heih dan kalh a nih thu leh dan lova Mizo mipuite tih buaina a nih thu a sawi lang baw.

Rajya Sabha MP chuan Principal Chief Commissioner of Income Tax Office, Guwahati, Assam hnenah hriattirna pe tur leh a tul dan ang a action la turin Rajya Sabha Chairman a ngen nghal baw a ni.



PWD MINISTER

PWD Minister Pu Vanlalhlana'n vawiin khan Durtlang Leitan Branch YMA din champha vawi 39 na lawmna hun Govt. Durtlang Middle School-III tualzawla an buatsaih chu Khuallian niin hun a hmanpui.

Pu Vanlalhlana chuan YMA chu pawl ropui tak a nih thu sawiin Chawimawi phute chawimawi chu Kristian nun ze pawimawh tak a ni a ti a, YMA chu tanpui ngaite tanpuitu anih avangin mi tin inngahna anih thu a sawi.

Minister chuan Hlawhtlinna thuruk chu taimakna, hun vawn dik leh mahni fel taka in vawn a ni tiin midangte tanpui uar theuh turin kalkhawmte a chah baw.



RD&AD MINISTER

RD Minister Prof Lalnilawma'n Mizoramah nizung chakna hmang tangkai turin hma lak mek zel ani a ti a, kuthnathawktuten an hnathawhna hmun thlenga an hman tangkai turin theihtawp chhuah mek ani a ti.

Vawiin khan Rural Development & Administration Minister Prof. Lalnilawma chuan MzSRLM leh SELCO Foundation te thawh hona hnuai hmalakna peng

pakhat atan Solar Sprayer chu loneitu mi 11 thlan chhuahte hnenah a sem a, Minister chuan ram changkang leh ram hmasawn apiangin solar energy pawimawhzia an hria tih sawiin a hman tangkai dan chu tunlaia khawvelin a zir nasat leh ram ropuite pawh an intlansiakna pui ber zinga pakhat a nih thu sawiin Mizoramah pawh solar energy hmang tangkai tura hma lak mek zel a nih thu a sawi a. Solar energy lam buaipuitu SELCO Foundation nen thawh hona kalpui mek a nih thu sawiin, solar technology hrang hrang hmangin thingtlang lama kuthnathawktute, self-help group, loneitute leh sumdawng hrang hrangte pawhin hmasawna hmel an hmuh chhoh zela, an sum deh chhuahte pawh a lo pun deuh deuh theih nan RD&AD Department chuan theihtawp a chhuah zel tur thu a sawi bawk a ni.

MzSRLM leh SELCO Foundation te hian April 2025 khan thawh hona thuthlung (MOU) an zia a, vawiina loneitute hnena solar sprayer sem hi he thawh hona kal zela hmalakna pakhat a ni. He thawh hona hian a tum ber chu, loneitute leh ei zawna hrang hrang kalpuitute tana ni zung chakna hmang khawl chi hrang hrang - solar dryers, solar sprayers, deep freezers, tailoring units, handloom lighting systems leh a dangte hmang tangkaia, an dinhmun chawisan leh tanpui te a ni.



LUNGLEI POLICE CYBER CELL

Lunglei District Police Cyber Cell hma laknaa CEIR Portal hmanga mobile phone bo leh ruk hmuh let mobile phone 24, cheng nuai 3.53 (₹3,53,174/-) man hu chu nimin khan a neitu dik takte hnena hlan letna hun hman a ni.

Lunglei Addl SP Pu K. Beihmotaosa chuan Mizoram chhung leh pawnah mobile phone bo leh ruk bo a tam tih sawiin, Lunglei Cyber Cell chuan report an dawn chu CEIR Portal kal tlangin a tam thei ang ber chhui chhuahsak zel an tum tih a sawi a. Phone bo zawn chu thil hautak leh awlai lo tak a nih thu sawiin, a hlawhtlinna pawh CEIR Portal tangkai leh awmze nei taka hman thin vang leh Cyber Cell staff-te thawhrimna vang a nih thu a sawi a. Mobile phone hlui (secondhand) leitute pawh fimkhur a ngaih thu sawiin, mobile phone bo rinhlelhawm tih hre reng chungah man tlawm tak taka lo leisaktute emaw, lo thleng saktute emaw chu an chungah dan anga hma lak a nih tur thu a sawi a. hetiang ti te chu thubuai pawh siamsak nual an nih tawh thu a sawi.

Lunglei Police Cyber Cell hian July ni 11, 2024-a din a nih atanga vawiin thlengin CEIR Portal kal tlangin mobile phone bo leh ruk bo 194 an hmuh letsak tawh a ni.



NO VEHICLE ZONE

Krismas leh Kum thar vuakvetah, kum danga lo tih thin tawh angin kuminah pawh Lirthei tlan phal lohna hun leh hmun 'No Vehicle Zone' siam a ni leh dawn.

Mizoram Chief Secretary Pu Khilli Ram Meena hovin, nimin khan Core Committee on Traffic Management chu Chief Secretary Conference Hall, MINECO-ah an thukhawm a. Christmass vuakveta Aizawl khawpui chhunga lirthei tlandan tur ngaihtuah ho a ni.

Thutkhawmnaah hian Unified Transport Co-ordination Committee (UTCC) Chairman leh Municipal Commissioner, Aizawl Municipal Corporation (AMC) in thurawn a pek te chu pawm a ni.

Aizawl Traffic Superintendent of Police in thupek a lo chhuah tawh angin, Aizawl khawpui chhunga lirthei intlanchhawknaw tur kawngpui dungte chu thu leh awm hma chuan hman chhonzawm zel a ni ang.

Kumin December Ni 23, 24 leh 31 December chawhma dar 10:30 atanga tlai dar 4:30 hian Chanmari atanga Zodin Square thleng chu No Vehicle Zone a puan a ni ang.

